

Jon

anêᶇ kapyā mōᶇ

Abô mōᶇ

Sebedi namalô aposel Jon hato kapyā êntêk hadêᶇ avômalô êvhaviᶇ. Kêdôᶇwaga abôyaᶇ bôk êlêm ba enaᶇ nena dahôlôᶇ ma nôᶇ mavi ma kupik ma kambom ba thai ma nôᶇ lokwanju. Ba enaᶇ nena Kilisi anêᶇ dahô iyom intu halêm anêᶇ leᶇ ma anêᶇ kupik ma miᶇ Kilisi ami. Ma enaᶇ nena kupik hatôm idum kambom ma dahô ma mabuᶇ mavi denaᶇ. Jon halaᶇô abôyaᶇ êᶇ ba intu hato kapyā êntêk ek thêlô neyabiᶇ i esak abôyaᶇ takêᶇ.

Hato kapyā êntêk hadêᶇ 85 lo 95 AD malêvôᶇ doho la.

Abô lôkmala halêm yaᶇ

¹*Yêlô ato hathak Abô atu ba hêv lôkmala ba hêk hadêᶇ sêbôk atu ba mōᶇ anôᶇ. Yêlô bôk alaᶇô lôk ayê hathak malenᶇ lôk atitiᶇ ba bahenᶇ hasôm haviᶇ.

²*Lôkmala êᶇ bôk habitak yaᶇ ba yêlô ayê ba ik loᶇ ba intu anan abô hathak lôkmala atu ba nêᶇ waknômbêᶇ intu sapêᶇ bêᶇ hadêᶇ mōlô. Bôk hamô haviᶇ Lambô vêm ma hik i thô hadêᶇ yêlô.

³Nômkaᶇ takatu ba yêlô bôk ayê lôk alaᶇô yôv ma lêk anan bêᶇ hadêᶇ mōlô ek nôᶇ esak donᶇtom

* **1:1:** Jon 1:1 * **1:2:** Jon 1:14

imbiñ yêlô. Avanôn biñ nena alalô lêk amô hathak donjom haviñ Lambô lo Namalô Yisu Kilisi.

⁴*Yêlô ato abô takêntêk ek alalô lôkthô lenjîmavi bêt anôn êmô kapôlônjî sinj.

Alalô namben Wapômbên anên deda kapô

⁵*Abô takatu ba bôk alañ anên yani, êntêk yêlô anañ bêt hadên mólô nena Wapômbên ma deda ba momañiniñ la miñ hamô haviñ yani ami. Mi.

⁶*Alalô anañ nena amô hathak donjom haviñ yani ma donjom aven momañiniñ denañ, êñ ma anañ abôyan ba miñ asopa abô avanôn ami.

⁷Ma donjom alalô aven deda kapô hatôm yani hamô deda kapô, êñ ma alalô amô hathak donjom haviñ i. Ma Namalô Yisu anên thalalen hathak havôkwîñ alalôaniñ kambom lôkthô vê.

⁸*Alalô anañ nena kambom miñ hamô alalô kapôlônjîñ ami, êñ ma asau alalôda ba abô avanôn miñ hamiñ alalô kapôlônjîñ ami.

⁹Alalô anañ alalôaniñ kambom bêt ma yani ma anyô thêthôn ba abô takatu ba hanañ ma tem indum ba injik anôn ba intu tem nêk kambom takên vê ma êmbôkwîñ alalôaniñ lelaik lôkthô.

¹⁰Aên ba alalô anañ nena miñ bôk adum kambom te ami, êñ ma adum yani hatôm anyô abôyan ba anên abô miñ hamiñ alalô kapôlônjîñ ami.

2

Yisu, anyô hêv alalô thêvô

* 1:4: Jon 16:24

* 1:5: 1Ti 6:16; Jem 1:17

* 1:6: 1Jon 2:4

* 1:8: Sng 32:5; Snd 28:13

¹ *Yenan avômena, yahato abô takêntêk hadên môle ek min nundum kambom ami. Ma anyôla hadum kambom, ên ma alalôaniñ anyô hêv alalô thêvô hamô ba hathak hanañ abô haviñ Lambô ek hêv alalô bulubiñ. Yani ma Yisu Kilisi ôpatu ba thêthôn anôn.

² *Yani hêv i hatôm da ek alalôaniñ kambom anên malaiñ min êpôm alalô ami. Ma yani min hadum ku ên ek nêma alalô iyom sa ami. Mi, hadum ek nêma avômalô pik sapên sa.

³ Alalô asopa anên abô balabuñ, ên ma hik thô nena ayala yani.

⁴ Anyôla hanañ nena, “Yahayala Wapômbên” ma donjom min hasopa anên abô balabuñ ami, ên ma anyô abôyañ ba abô avanôn min hamiñ ôpên kapô ami.

⁵ *Ma donjom anyôla hasopa Wapômbên anên abô, ên ma avanôn biñ nena Wapômbên anên la-haviñ hik anôn hamiñ yani kapô. Aên ba intu ayala nena alalô amô haviñ yani.

⁶ Anyôla hanañ nena, “Yahamô haviñ Wapômbên”, ên ma esopa Yisu vanğwam.

Balabuñ leñimbiñ iviyañ

⁷ *Aiyañ thêlô, balabuñ atu ba yahato hadên môle ma min balabuñ lukmuk ami. Mi, balabuñ bô ba bôk hamô haviñ môle môn anôn. Balabuñ bô ên ma abô atu ba bôk olañ yôv.

⁸ *Ma donjom balabuñ bô ên ma hatôm balabuñ lukmuk haviñ ek malê nena hik anôn hamiñ yani

* 2:1: Hib 7:25-26 * 2:2: Jon 1:29; Kol 1:20; 1Jon 4:10 * 2:5: Jon 14:21,23 * 2:7: Jon 13:34; 2Jon 5-6 * 2:8: Jon 1:9; Lom 13:12

lôk môle ba momaniniñ lêk hale ba hi ma deda anônj lêk habi hayô yôv.

⁹*Opalê atu ba hanañ nena hamô deda kapô ma donjom hapôlik ek iviyañ, êñ ma hamô momaniniñ dena.

¹⁰*Ma opalê atu ba lahaviñ iviyañ hamô deda kapô ba nômlate miñ hamô yani kapô ek indum yani nêmi yak ami.

¹¹*Ma donjom opalê atu ba hapôlik ek iviyañ ma yani hamô momaniniñ kapô ba momaniniñ habuliñ yani madaluk ba intu hasimô haven ba miñ hayala loñ atu ba hi ami.

¹²Avômena, hathak yani anên athên bôk hêv môle nim kambom vê yôv ba intu yahato hadên môle.

¹³Kamik thêlô, bôk oyala ôpatu ba hamô hadên môn anônj yôv ba intu yahato hadên môle.

Anyô muk, môle bôk lovak ba ômô Sadañ atu lu yôv ba intu yahato hadên môle.

Avômena, bôk oyala Lemambô yôv ba intu yahato hadên môle.

¹⁴Kamik thêlô, bôk oyala ôpatu ba hamô hadên môn anônj yôv ba intu yahato hadên môle.

Anyô muk, môle othak umiñ lôklokwañ lôk ovalon Wapômbên anên abô loñ ba intu lovak ba ômô Sadañ atu lu yôv. Aên ba intu yahato hadên môle.

Miñ lemiñbiñ nômkama pik ami

15 *Minj leminbinj kobom pik lôk anêṇ nômkaṁami. Ôpatu ba lahavinj kobom pik ma minj lahavinj Lambô ami.

16 *Pik anêṇ nômkaṁami sapêṇ lôk anêṇ alak lôk malenjikilik lôk habôî hathak anêṇ nômkaṁami minj halêm anêṇ Lambô ami. Mi, pik anêṇ.

17 *Pik lôk anêṇ alak lêk hadum ek nêṁ yak, ma donjom ôpatu ba hasopa Wapômbêṇ anêṇ lahavinj tem êmô wak nômbêṇ intu sapêṇ.

Anyô hapôlik ek Kilisi

18 *Yenanj avômena, waklavôṇ pik lo lenj anêṇ danj lêk habobo. Ma môlô bôk olanô nena anyô hapôlik ek Kilisi atu tem êlêm. Ma lêk bêṇ anôṇ êlêm yôv. Ba intu ayala nena waklavôṇ pik lo lenj anêṇ danj lêk habobo.

19 *Bôk thêlô êmô havinj alalô ma donjom lêk etak ba i. Thêlô minj alalôaniṇ te ami. Thêlô ma alalôaniṇ ma tem minj netak alalô ami. Ma donjom etak alalô ma hik thô nena thêlô ma minj alalôaniṇ te ami.

20 *Ma donjom Anyô Mathenj Yisu bôk hêv Lovak Mathenj hadêṇ môlô yôv ba intu môlô lôkthô oyala abô avanôṇ.

21 Minj yahakô nena môlô ôthôṇ abô avanôṇ palin ba yahato abô takêntêk hadêṇ môlô ami. Mi, môlô bôk oyala yôv ma abôyanj minj hamô abô avanôṇ kapô ami. Ba intu yahato hadêṇ môlô.

22 *Opalê intu anyô abôyanj? Ôpatu ba hananj nena Yisu ma minj Mesaya ami. Yani êṇ intu anyô

* 2:15: Lom 8:7 * 2:16: Lom 13:14 * 2:17: Mat 7:21 * 2:18: Mat 24:5,24; 2Jon 7 * 2:19: Ap 20:30 * 2:20: 1Ko 2:15; 2Ko 1:21; 2Jon 2 * 2:22: 1Jon 4:3; 2Jon 7

hapôlik ek Kilisi ma havôlinj dô m hadêj Lambô lo Nakaduŋ.

23 *Ôpatu ba havôlinj dô m hadêj Nakaduŋ min hamô haviŋ Lambô ami. Ma donjom ôpatu ba hanaŋ anêj hêvhaviŋ Nakaduŋ bêj, êj ma hamô haviŋ Lambô aêj iyom.

24 Noyabinj am ek abô takatu ba bôk olaŋô hadêj môj anôj ma nobaloŋ loŋ lôklokwaŋ. Abô êj hamô haviŋ môlô, êj ma tem nô m imbiŋ Nakaduŋ lo Lambô aêj iyom.

25 Ma yani bôk havak abô yôv haviŋ alalô nena tem nê m lôkmala atu ba nê m wak nô mbêj intu sapêj êndêj alalô.

26 Yahato abô takêntêk hadêj môlô hathak nê takatu ba idum ek nesau môlô.

27 *Kilisi bôk hêv Lovak Mathenj hadêj môlô ba hamô haviŋ môlô denaŋ. Ma Lovak Mathenj êj hathak hadôj môlô hathak nô mkama lôkthô ma anêj abô ma avanôj iyom ma abôyaŋ mi. Aêj ba minj notak anyôla ek êndôj môlô esak loŋbô ami. Mi, nosopa auk takatu ba Lovak Mathenj hadôj môlô nena nô m Yisu kapô.

28 Yenaŋ avômena, nô m imbiŋ yani thêthô ek waklavôj yani hale halê m ma tem numinj lôklokwaŋ ma mama mi ênjêk yani ma.

29 *Môlô bôk oyala yôv nena yani ma anyô thêthôj lôk oyala haviŋ nena opalêla takatu ba ê m thêthôj ma bôk ibitak Wapô mbêj nali yôv.

* 2:23: Jon 5:23; 1Jon 4:15; 5:1 * 2:27: Jon 16:13 * 2:29: 1Jon 3:10

3

Alalô ma Wapômbêñ nali

¹ *Kamik Bêñ lahaviñ alalô bomañ anôñ ba intu halam alalô nena anêñ nali. Avanôñ biñ nena alalô ma anêñ nali. Ma avômalô pik miñ bôk eyala yani ami ba intu miñ eyala alalô ami.

² *Aiyañ thêlô, alalô ma lêk Wapômbêñ anêñ nali. Ma embeñ yam ka tem alalô nambitak aisê? Injo, Wapômbêñ miñ hik thô ami denañ ba intu athôñ palin. Ma donjom waklavôñ yani endelêm ma tem alalô nagê anêñ lôkmañgiñ thô êtôm atu ba yani hamô. Ba intu nayala nena alalô tem nambitak êtôm yanida.

³ Avômalô sapêñ atu ba êv malenñ ek yani ethak epesañ kapôlônñ ek nimbitak mabuñ mavi êtôm yani atu ba mabuñ mavi.

⁴ Nê takatu ba idum kambom thêthô ma êvôlin dômiñ ek abô balabuñ. Avanôñ, kambom anêñ ôdôn nena êvôlin dômiñ hathak abô balabuñ.

⁵ *Môlô oyala nena Kilisi halêm pik ek nêñ alalôaniñ kambom vê, ma yanida ma kambom mi.

⁶ Ôpatu ba hamô haviñ yani miñ hadum kambom thêthô ami. Ma ôpatu ba hadum kambom thêthô miñ bôk hayê lo hayala yani ami.

⁷ Yenañ avômena, noyabiñ am ek anyôla miñ esau môlô ami. Ôpatu ba hadum kobom thêthôn, yani ma thêthôn hatôm Kilisi atu ba thêthôn.

⁸ *Sadañ bôk hadum kambom hadêñ môñ anôñ ba halêm. Ba intu ôpatu ba hadum kambom thêthô,

* **3:1:** Jon 1:12-13; 16:3 * **3:2:** 2Ko 3:18 * **3:5:** Jon 1:29; 1Pi 2:22-24; 1Jon 2:2 * **3:8:** Jon 8:44

êṇ ma Sadan anêṇ. Ba intu Wapômbêṇ Nakadun halêm pik ek imbuliṇ Sadan anêṇ ku.

⁹* Ôpatu ba bôk habitak Wapômbêṇ nakadun yôv miṇ hadum kambom thêthô ami ek malê nena Wapômbêṇ anêṇ yaṇvêk hamiṇ yani kapô. Yani bôk habitak Wapômbêṇ nakadun yôv ba intu miṇ hatôm indum kambom thêthô ami.

¹⁰ Ba intu yêlô ayala nena Wapômbêṇ anêṇ nali ma opalêla ma Sadan anêṇ ma opalêla. Nê takatu ba miṇ idum kobom thêthôn ami lôk miṇ leṇiṇhaviṇ iviyaṇ ami, thêlô ma miṇ Wapômbêṇ anêṇ nali ami.

Lemimbiṇ môleviyaṇ

¹¹* Abô atu ba bôk môle olaṇô môn anôn yôv nena môle lemimimbiṇ môleviyaṇ.

¹²* Ma miṇ nosopa Kain ami. Yani ma ṇgôk kambom atu anêṇ ba hik yaṇ molok vônô. Ma hik eka? Ek malê nena hathak hadum kambom ma yaṇ molok hathak hadum mavi.

¹³* Aêṇ ba aiyaṇ thêlô, avômalô pik êpôlik ek môle ma miṇ noson ami.

¹⁴* Alalô leṇiṇhaviṇ iviyaṇ, êṇ ma hik thô nena bôk atak ṇama ma lêk awa lôkmala yôv. Ma donṭom ôpatu ba miṇ lahaviṇ iviyaṇ ami ma ṇama havalon yani lon denaṇ.

¹⁵* Nê takatu ba êpôlik hathak iviyaṇ ma hatôm nê ik anyô vônô. Ma môle oyala nena nê ik anyô vônô tem miṇ nê môle lôkmala êtôm wak nômbêṇ intu sapêṇ ami.

* **3:9:** 1Jon 5:18 * **3:11:** Jon 13:34 * **3:12:** Stt 4:8 * **3:13:**
Jon 5:18-19 * **3:14:** Jon 5:24 * **3:15:** ALK 21:8

16 *Yisu hêv anêṅ lôkmala ek alalô ba intu ayala leṅṅhaviṅ anêṅ ôdôṅ. Ma natak alalôaniṅ lôkmala aêṅ iyom ek nanêm alalôaniṅ iviyaṅ sa.

17 *Ma opalêla takatu ba iniṅ nômkama hamô ba êyê iviyaṅ nômkama mi ba êv i sêkêya ma miṅ leṅhiki hathak i ami, êṅ ma Wapômbêṅ anêṅ la-haviṅ miṅ hamô haviṅ i ami.

18 *Yenaṅ avômena, miṅ lemimbiṅ avômalô esak abô lôk venjbôlêk iyom ami. Mi, nuṅgwik thô esak kobom avanôṅ nena nônêm i sa.

19-20 Kobom êṅ hik thô nena abô avanôṅ hamô haviṅ alalô. Ma donṭom kapôlôṅiṅ malaiṅ hathak alalôaniṅ kambom, êṅ ma leṅimbi nena Wapômbêṅ hayala nômkama sapêṅ ba anêṅ lahiki hamôṅ ek alalô kapôlôṅiṅ. Ba intu umiṅ thohavloma ma kapôlômim êṅjêk yaô.

21 *Aêṅ ba aiyaṅ thêlô, alalô kapôlôṅiṅ miṅ hanaṅ alalô bêṅ ami, êṅ ma hatôm amiṅ lôklokwan ma kô mi hêk Wapômbêṅ ma.

22 Ma malêla takatu ba alalô atêṅ yani ek nêṁ, ma tem nêṁ iyom ek malê nena alalô asopa anêṅ abô balabuṅ lôk adum nôṁ takatu ba hadum yani lamavi.

23 *Ma anêṅ abô balabuṅ hanaṅ nena nônêṁimbiṅ anêṅ Nakaduṅ Yisu Kilisi anêṅ athêṅ lôk lemimimbiṅ môlôviyaṅ êtôm atu ba hanaṅ.

24 *Ôpatu ba hasopa Wapômbêṅ anêṅ abô balabuṅ ma hamô haviṅ yani ma yani hamô haviṅ ôpêṅ. Ma Lovak Mathen atu ba Wapômbêṅ hêv

* 3:16: Jon 13:1; Gal 1:4 * 3:17: Lo 15:7 * 3:18: Jem 2:15-16
 * 3:21: Hib 4:16 * 3:23: Jon 6:29; 13:34 * 3:24: 1Jon 4:13

hadêṅ alalô intu hik thô nena Wapômbêṅ hamô haviṅ alalô.

4

Noyawê ba ôṅgô nena halêm anêṅ êsê

¹ *Aiyaṅ thêlô, ṅê plopet abôyaṅ bêṅ anôṅ bôk i pik mayaliv. Ba intu miṅ nônémimbiṅ ṅê takatu ba enaṅ nena Lovak Matherṅ hêv abô hadêṅ i ami. Mi, noyawê katô ba ôṅgô nena iniṅ abô halêm anêṅ Wapômbêṅ anêṅ Lovak Matherṅ mena mi e?

² *Ma tem noyala abô takatu ba halêm anêṅ Wapômbêṅ anêṅ Lovak Matherṅ ma aêntêk. Ôpatu ba hanaṅ anêṅ hêvhaviṅ bêṅ nena, “Yisu Kilisi bôk habitak anyô anôṅ” ma Lovak Matherṅ hêv abô êṅ hadêṅ ôpêṅ.

³ *Ma donṭom ôpatu ba miṅ hanaṅ anêṅ hêvhaviṅ Yisu bêṅ aêṅ ami, ôpêṅ anêṅ abô miṅ halêm anêṅ Wapômbêṅ ami. Mi, halêm anêṅ ôpatu ba hapôlik hathak Kilisi atu. Môlô bôk olaṅô nena anyô hapôlik ek Kilisi êṅ tem êlêm ma lêk anêṅ auk hamô pik yôv.

⁴ *Ma donṭom yenaṅ avômena, môlô ma Wapômbêṅ anêṅ ba ôpatu ba hamô haviṅ môlô ma bêṅ ek ôpatu ba hamô pik. Ba intu môlô bôk ômô ṅê takêṅ lu yôv.

⁵ *Thêlô ma pik anêṅ ba intu enaṅ pik anêṅ abô ba avômalô pik elanô.

⁶ Ma donṭom alalô ma Wapômbêṅ anêṅ ba avômalô takatu ba eyala Wapômbêṅ elanô

* 4:1: Mat 7:15; 1Te 5:21; 1Jon 2:18; 2Jon 7

* 4:2: 1Ko 12:3

* 4:3: 1Jon 2:18 * 4:4: Mat 12:29; 1Jon 5:4-5

* 4:5: Jon 8:47;

alalôaniñ abô. Ma donțtom avômalô takatu ba miñ Wapômbêñ anêñ ami miñ elañô alalôaniñ abô ami. Ma aêñ iyom, alalô tem nayala Lovak Mathen anêñ abô avanôn lôk auk pik anêñ abôyañ.

Wapômbêñ ma leñhaviñ anêñ ôdôn

⁷ Aiañ thêlô, leñhaviñ halêm anêñ Wapômbêñ ba intu môle lemimimbiñ am. Avômalô takatu ba leñhaviñ hamô haviñ i, thêlô ma Wapômbêñ anêñ nali ba eyala yani.

⁸ Wapômbêñ ma leñhaviñ anêñ ôdôn ba intu opalêla takatu ba leñhaviñ mi hêk i ma miñ eyala Wapômbêñ ami.

⁹ *Wapômbêñ anêñ Nakaduñ donțtom iyom ba hêv halêm pik ek alalô namô lôkmala esak yani. Kobom êñ hik thô nena yani lahaviñ alalô bêñ anôn.

¹⁰ *Miñ oson nena leñhaviñ anôn ma alalôaniñ leñhaviñ Wapômbêñ. Mi, leñhaviñ anôn ma aêntêk. Wapômbêñ lahaviñ alalô ba hêv Nakaduñ ba hama ek alalôaniñ kambom anêñ malaiñ miñ êpôm alalô ami.

¹¹ Aêñ ba aiañ thêlô, Wapômbêñ bôk lahaviñ alalô bêñ anôn ba intu mavi ek môle lemimimbiñ môleviyañ aêñ iyom.

¹² *Anyô te miñ bôk hayê Wapômbêñ ami. Ma donțtom alalô leñhaviñ i ma Wapômbêñ hamô haviñ alalô ma anêñ lahaviñ êñ hik anôn hamiñ alalô.

* **4:9:** Jon 3:16 * **4:10:** Lom 5:8-10; 1Jon 2:2 * **4:12:** Jon 1:18

13 *Wapômbên bôk hêv anên Lovak Mathen yôv hadên alalô ba intu nayala nena lêk amô havin yani ma yani hamô havin alalô.

14 Ma yêlô bôk ayê hathak maleñin ba lêk anan bên nena Lambô bôk hêv Nakaduñ halêm ek nê avômalô pik bulubin.

15 Opalêla takatu ba enan inin êvhavin bên nena, “Yisu ma Wapômbên anên Nakaduñ”, êñ ma Wapômbên hamô havin thêlô ma thêlô êmô havin Wapômbên.

16 Ba intu alalô ayala lôk aêvhavin nena Wapômbên lahavin alalô.

Wapômbên ma leninhavin anên ôdôn ba intu opalêla takatu ba leninhavin hamô havin i ma êmô havin Wapômbên ma Wapômbên hamô havin i.

17 Alalô amô aên, êñ ma leninhavin hik anôn hamin alalô ba intu tem alalô namin lôklokwan ma kô mi êndên waklavôn Wapômbên indum abô. Pik êntêk ma asopa lonônê thêthôn hatôm yani bôk hasopa yôv ba intu tem min nakô ami.

18 Wapômbên lahavin alalô ba intu min nakô ami. Anên lahavin ma mabun anôn ba intu hêv kô vê. Ma opalê atu hakô ek waklavôn nindum abô hik thô nena leninhavin min hik anôn hamin yani ami.

19 Wapômbên lahavin alalô hamôn ba intu leninhavin hamô havin alalô.

20 Anyôla atu ba min lahavin iviyan atu ba hayê i ami, êñ ma min hatôm laimbîn Wapômbên atu ba min hayê ami. Ba intu anyôla hanan nena,

* 4:13: 2Ko 1:22; 1Jon 3:24

“Yalenhavin Wapômbên” ma donjom hapôlik ek iviyan, ôpên ma anyô abôyan.

²¹ *Wapômbên bôk hêv abô balabun yôv hadên alalô nena, “Opalêla takatu ba lenjinhavin Wapômbên ma lenjimbîn iviyan imbin.”

5

Êvhavin Wapômbên Nakadun

¹ *Avômalô takatu ba êvhavin nena Yisu ma Mesaya bôk ibitak Wapômbên nali yôv. Ma avômalô takatu ba lenjinhavin Lambô ma ethak lenjinhavin anên nali aên iyom.

² Alalô lenjinhavin Wapômbên lôk asopa anên balabun, ên ma hik thô nena alalô lenjinhavin Wapômbên nali havin.

³ *Alalô lenjinhavin Wapômbên, ên ma athak asopa anên abô balabun. Ma anên balabun min malain ek nasopa ami

⁴ ek malê nena Wapômbên anên nali sapên ik vovak ba êmô pik anên lôklokwan lu hathak êvhavin.

⁵ Ma avômalô takatu ba ik vovak havin pik anên lôklokwan ba êmô lu ma opalêla? Thêlô ma avômalô takatu ba êvhavin nena Yisu ma Wapômbên Nakadun.

Lavôñin atu ba hik Yisu thô

⁶ *Ma Yisu Kilisi halêm pik ba anên hathik nan lo anên thalalen hangasô hik yani thô. Min nan iyom ami. Mi, nan lo thalalen. Ma Lovak Mathen atu ba hana abô avanôn iyom hik yani thô havin.

* 4:21: Mak 12:29-31 * 5:1: 1Jon 4:15 * 5:3: Jon 14:15,23-24

* 5:6: Jon 1:29-34

7 Aênj ba intu nômlôkwanjlo hik yani thô aêntêk,

8 *Lovak Mathenj lo nanj ma thalalenj. Ma thêlô lô ênj êlôk hathak auk donjom iyom.*

9 *Alalô athak êvhavinj nê pik takatu ba ik nômla thô ininj abô. Ma Wapômbênj anênj abô ma hamô vulinj ek malê nena halêm anênj Wapômbênj da. Ma yani hik Nakadunj thô hathak nômlô êntêk.

10 *Opalêla takatu ba êvhavinj Wapômbênj Nakadunj eyala hêk kapôlônjin nena abô takênj ma avanônj. Ma donjom avômalô takatu ba minj êvhavinj Wapômbênj ami ma idum ba yani habitak hatôm anyô abôyanj ek malê nena minj êvhavinj abô takatu ba hananj hathak Nakadunj ami.

11 Ma abô takatu ba Wapômbênj hêv hadênj alalô ma aêntêk. Hêv alalô lôkmala namô wak nômbênj intu sapênj. Ma lôkmala ênj anênj ôdônj ma Nakadunj.

12 *Ôpatu ba hamô havinj Nakadunj ma hawa lôkmala ênj. Ma donjom opalêla takatu ba minj êmô havinj Wapômbênj Nakadunj ami ma minj ewa lôkmala ênj ami.

Lêk awa lôkmala yôv

13 *Yahato abô takêntêk hadênj môlô takatu ba ôêvhavinj Wapômbênj Nakadunj anênj athênj ek noy-ala nena lêk owa lôkmala atu ba nômlô wak nômbênj intu sapênj yôv.

14 *Ma alalô atenj yani hathak nômlate hatôm yani anênj lahavinj, ênj ma tem endanô. Ba intu minj

* 5:8: Jon 15:26 * 5:8: Mose anênj balabunj hananj nena anyô ju mena lô la enanj abô te ma avanônj (Lo 19:15). * 5:9: Jon 5:32-37

* 5:10: Jon 5:36-40 * 5:12: Jon 3:36 * 5:13: Jon 20:31 * 5:14: Jon 14:13-14; 1Jon 3:21-22

nakô nena tem minj endanjo alalôaniñ abô ami. Mi, tem endanjo.

¹⁵ Alalô ayala nena yani hathak halanjo alalôaniñ apetenak. Ba malêla takatu ba anañ hik yani lin ma nayala katô nena yani tem nê.

¹⁶⁻¹⁷ Ma kobom lokbanj sapênj ma kambom iyom. Kambom vi tem minj endom anyô ni lonj atum ami. Ba hôyê môleviyanj idum kambom êj, ma notenj mek ma Wapômbênj tem nê thêlô lôkmala. Ma donjom kambom vi halom anyô hi lonj atum ba minj yahananj ek notenj mek esak thêlô êj ami.*

Abô anêj danj

¹⁸ *Alalô ayala nena avômalô takatu ba bôk ibitak Wapômbênj nali minj idum kambom thêthô ami. Mi, Wapômbênj Nakadunj hayabinj thêlô ba ngôk kambom atu minj hatôm êsôm thêlô ami.

¹⁹ Alalô ayala nena alalô ma Wapômbênj anêj, ma donjom pik sapênj ma êmô ngôk kambom atu anêj lôklinjak kapô.

²⁰ Alalô ayala nena Wapômbênj Nakadunj bôk halêm yôv ba hêv auk hadênj alalô ek alalô hatôm nayala Wapômbênj ôpatu ba avanônj. Ma alalô amô havinj yani atu ba avanônj lôk Nakadunj Yisu Kilisi. Yani ma Wapômbênj anônj binj lôk lôkmala atu ba nêômô wak nômbênj intu sapênj.

²¹ Yenanj avômena, nôômô daim ek malêla takatu ba hawa Wapômbênj anêj lonj.

* **5:16-17:** Nôngô Mak 3:29 ma Matyu 12:31 lôk Hiblu 6:4-6 lo 10:29-31. * **5:18:** 1Jon 3:9

Wapômbên Anê Abô Mathen
The New Testament in the Malei-Hote Language of
Papua New Guinea
Nupela Testamen long tokples Maei-Hote long Niugini
copyright © 2010 Wycliffe Bible Translators, Inc. and The Malê people
Language: Hotê-Malê (Malei-Hote)

Translation by: Wycliffe Bible Translators

Contributor: The Malê people

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Mar 2025 from source files
dated 31 Aug 2023

c8e90bc3-6cab-57b1-9a48-04f5f30fe59a